

# INUIT ATAQATIGIIT

## INATSISARTUNI



Nuuk, 12.09 2013

Inatsisartut suleriaasianni § 37 naapertorlugu Naalakkersuisunut apeqquq imaattoq nassiuppara:

### Apeqqutit:

- 1) Igitassanik piiaaneq pillugu Namminersornerullutik Oqartussat nalunaarutaat nr. 28, 17. september 1993-imeersoq naapertorlugu "Igitassanik sunilluunniit nunaminertanut namminersortunit pisortanilluunniit pigineqartunut inissiisoqaraniluunniit eqqaasoqassanngilaq."

Inerteqqummi tassani cigaretsikut aamma pineqarpat?

- 2) Kommunit nalunaarummi tassani § 17, imm. 4, tungavigalugu pisussaaffeqarput eqqaavinnik siparninik eqqaavinnillu containerinik pisorta qarfiit eqqaanni inissiinissaminut.

Inoqarporli cigaretsikunut eqqaavinnik siparninik atuinissamut toqqissisimanngitsunik, qamilluarsimanngikkaanni ikualalersinnaanerat pissutigalugu.

- 3) Tamannattaq pissutigalugu § 3, imm. 2, pujortarnissamik inerteqqut pillugu Inatsisartut inatsisaanni nr. 15-imi 26. maj 2010-meersumi aalajangersarneqarpoq silami pujortartarfimmi (tassalu illuaqqani pujortartarfinni assigisaannilu) cigaretsikunut eqqaaveqassasoq matusartunik. Taamali piumasaqaateqartoqanngilaq avatangiisini aammaannartuni, aqquserngit killingini allanilu, kommunit eqqaavinnik inissiisussaataaffiini.

Naalakkersuisut isumaliutigerusuppaat nalunaarummi aalajangersagaq § 17 imm. 4 annertusillugu taakkunani aamma matusartunik cigaretsikoorfeqalersitsinissaq?

- 4) Naalakkersuisut eqqarsaatigaat avatangiisit minguitsuutinnissaat anguniarlugu ileqqunik allannguissamut paasisitsiniaanissaq?

(Inatsisartuni ilaasortaq Juliane Henningsen, Inuit Ataqtigiiit)

### Tungavilersuut:

Cigaretsikorpassuit aqqusinermi, pinngortitami, bussit unittarfiini, ilami sumulluunniit pigaluaaraanni maaniinnarmiittut takujuarlugit kusanaaqaat. Taamatullu aamma toqqissisimananngilaq eqqarsaatigalugu meeraaqqat nakkutigineqanngitsiarnermiinni cigaretsikunik tigusillutik oqummiussinnaanerat. Imaluunniit eqqarsaatigalugu piffissaq

qanoq sivilutigisoq ingerlasariaqarnersoq pinngortitap cigaretsit kimmiviinik nungutitsinissaanut: Ukiut ataatsimiit tallimanut.

2010-mi Upernavimmi innuttaasut nal. akunnerisa marluk ingerlanerinnaanni cigaretsikut 48 kiilut katersorpaat. Ilulissani 70 kiilut katersorneqarput nal. akunneri pingasuunngitsulluunniit ingerlanerini. Nalunngilaralu aamma illoqarfinni allani tamakku assinginik salititsisoqarnikuusoq.

Taama suliniuteqartarnerit nersortariaqarput – avatangiisit inuuffigisatta kusanarnerulernissaannaat pinnagu, aammali igitassanik ajornartorsuutit annertusiartuinnartut nakkutiginerulernissaat eqqarsaatigalugu.

Taamaamat tamakku pillugit inatsisitigut sinaakkutaasut naammannersut apeqquserpara, aammalu sakkortunerusunik malittarisassaqaarnissaq pisariaqarnersoq, inuiaqatigiittut avatangiisitsinnik illersuinissarput pillugu ileqqutsinnik allannguinissatsinnut. Tamatta akisussaaffipput taanna isumaga malillugu maleruagassanik inuiaqatigiit ileqquinut naapertuuttunik malitseqartariaqarpoq.

Qinnutigissavara apeqqutikka ullut suliffiusut qulit iluanni akineqariissasut.